

错悞部总论

风俗通

正失篇序

孔子曰众善焉必察之众恶焉必察之孟轲云尧舜不胜其美桀纣不胜其恶传言失指图景失形众口铄金积毁消骨久矣其患之也是故乐正后夔有一足之论晋师己亥渡河有三豕之文非夫大圣至明孰能原析之乎论语名不正则言不顺易称失之毫厘差以千里故纠其谬曰正失也

错悞部纪事

南齐书张融传融与吏部尚书何戢善往诣戢误通尚书刘澄融下车入门乃曰非是至户外望澄又曰非是既造席视澄曰都自非是乃去其为异如此

伽蓝记萧衍子西丰侯萧正德归降时元义欲为设茗先问卿于水厄多少正德不晓义意答曰下官虽生于水乡而立身以来未遭阳侯之难元义与举坐之客大笑焉

册府元龟崔敬嗣好携菹饮酒则天初为房州刺史中宗为庐陵王安置在州官吏多无礼敬嗣独申礼敬又供给丰贍中宗常德之及登位有益州长史崔敬嗣既同姓名每进拟官皆御笔超拜之者数四后引与语知口访敬嗣已卒乃遣中书令韦安石授其子官

冷斋夜话僧伽龙朔中游江淮间其迹甚异有问之曰汝何姓答曰姓何又问何国人答曰何国人唐李邕作碑不晓其言乃书传曰大师姓何何国人此正所谓对痴人说梦耳李邕遂以梦为真真痴绝也僧赞宁以其传编入僧史又从而解之曰其言姓何亦犹康会本康居国人便死为康僧会详何国在碎叶东北乃碎叶国附庸耳此又梦中说梦可掩卷一笑大唐新语苏良嗣为荆州长史荆州旧有河东寺后梁萧□为其兄河东王所造良嗣见而惊曰此在江汉之间与河东有何关涉遂奏改之良嗣寡学深为人所笑

琅嬛记张九龄知萧昺不学故相调谑一日送芋书称蹲鸱萧答云损芋拜嘉惟蹲鸱未至耳然仆家多怪亦不愿见此恶鸟也九龄以书示客满坐大笑

缙素杂记王元宝富而无学识尝会宾客明日亲友谓之曰昨日必多佳论元宝曰但费锦缠头耳良可嗤笑

唐国史补□昂与韦陟友善因话国朝宰相陟曰谁最无德昂误对曰韦安石也已而惊走出逢吉温于街中温问何此仓皇答曰适与韦尚书话国朝宰相最无德者本欲言吉頊误云韦安石既而又失言复鞭马而走抵房相之第管执手慰问之复以房融为对昂有时称忽一日触犯三人举朝嗟叹惟韦陟遂与之绝

因话录有书生读经书甚精熟不知近代事因说骆宾王遂云某识其孙李少府者兄弟太多意谓骆宾是诸王封号也今人往往说旧云准皇太子教不知皇太子合称□今称教乃王公也下此皆不知根本之误

纪闻唐临济令李回妻张氏其父为庐州长史告老归以回之薄其女也故往临济辱之误至全节县而问门人曰明府在乎门者曰在张遂入至厅前大骂辱全节令赵子余不知其故私自门窥之见一老父诟骂不已而县下常有狐魅以张为狐焉乃密召吏人执而鞭之张亦未悟骂仍恣肆击之困极方向何人辄此诟骂乃自言吾李回妻父也回贱吾女来怒回耳全节令方知其误置之馆给医药焉张之僮夜亡至临济告回回大怒遣人吏数百将袭全节而击令令惧闭门守之回遂至郡诉之太守召令责之恕其误也使出钱二十万遗张长史以和之回乃迎至县张喜回之报复卒不言其薄女遂归

干子唐贞元中萧俯新及第时国医王彦伯住太平里与给事郑云逵比舍住忽患寒热早诣彦伯求诊候误入云逵第会门人他适云逵立于中门俯前趋曰某前及第有期集之役忽患具说其状逵命仆

人延坐为诊其臂曰据脉候是心家热风云逵姓郑若觅国医王彦伯东邻是也俯赧然而去

唐尚书裴胄镇江陵常与苑论有旧论及第后更不相见但书扎通问而已论弟方应举过江陵行谒地主之礼客因见名曰秀才之名虽字不同且难于尚书前为礼如何会怀中有论旧名纸便谓客将曰某自别有名客将见日晚仓惶遽将名入胄喜曰苑大来矣屈入半庭胄见貌异及坐揖曰足下第几对曰第四胄曰与苑大远近曰家兄又问曰足下正名何对曰名论又曰贤弟改名乎曰家兄也名论公庭将吏于是皆笑及引坐乃陈本名名既逵巡于使院俄而远近悉知

摭言郑熏侍郎主文误谓颜标乃鲁公之后时徐方未宁意在激劝忠烈即以标为状元谢日问及庙院标曰寒峻未尝有也始知误取或嘲曰主司头脑太冬烘错认颜标作鲁公

因话录京兆尹庞严及第后从事寿春有江淮举人姓严见登科记误以严为姓遂赁舟丐食就谒时郡中止有一判官亦更不问其氏便诣门投刺称从侄庞之族人甚少览刺极喜延纳殷勤便留款曲兼命对举匕筋久之语及族人都非庞氏之事严方讶之因问郎君何姓曰某姓严严抚掌大笑曰君误矣严是我名预君何事揖之令去其人尚拜谢称叔父从容而退

卢尚书弘宣与姨弟卢衢州简辞同在京一日衢州早出尚书问有何除改答曰无大除改惟皮遐叔除蜀中刺史尚书不知皮是遐叔姓谓是宗人低头久之曰我弥当家没处得卢皮遐来衢州为辨之皆大笑

大唐新语张由古有吏才而无学术累历台省尝于众中叹班固大才文章不入文选或谓之曰两都赋燕山铭典引等并入文选何为言无由古曰此并班孟坚文章何关班固事闻者掩口而笑又谓同官曰昨买得王僧孺集大有道理杜文范知其□应声曰

文范亦买得张佛袍集胜于僧襦远矣由古竟不知觉仕进者可不勉欤

益州每岁进柑子皆以纸裹之他时长吏嫌纸不敬代以细布既而恐柑子为布所损每怀忧惧俄有御史甘子布使于蜀驿使驰白长吏有御史甘子布至长吏以为推布裹柑子事惧曰果为所推及子布到驿长吏但序以布裹柑子为敬子布初不之知久而方悟闻者莫不大笑

玉泉子举人李文彬受知于舍人纆干泊有同时京兆府司录贺兰泊卒彬因谒紫微问今日有何新事对曰适过府闻纆干泊卒泊曰莫错否彬曰不错泊曰君文似共鬼语也拂衣而入彬乃悟盖俱重姓又同名而误对也

尚书故实有黄金生者擢进士第人问与颇同房否对曰别洞黄本溪洞豪姓生故以此对人虽哈之亦赏其真实也

泊宅编天禧年殿前放状元王整以下及第是时衢睦二州各有一王言待唱初唤王言赐进士及第乃衢人久之又唤一王言上问其乡贯知前赐第者合是睦州而衢州者只合得进士出身及再唤二人审问衢人奏恳念臣已谢圣恩遂只赐睦州者同出身而已明日忽有旨赐睦州王言进士及第自后殿前唱名必传呼某人某州以防差误

湘山野录李建勋罢相江南出镇豫章一日与宾僚游东山各事宽履轻衫携酒肴引步于渔溪樵坞之间遇佳处则饮忽平田间一茅舍有儿童诵书声相君携策就之乃一老叟教数村童叟惊悚离席改容趋谢而翔雅有体气调潇洒丞相爱之遂觞于其庐置之客右叟亦不敢辄谈李以晚渴连食数梨宾僚有曰此不宜多食号为五脏刀斧叟窃笑丞相曰先生哂之必有异闻叟谢曰小子愚贱偶失容于钧重然实无所闻李坚质之仍胁以巨觥曰无说则沃之叟不得已问说者曰敢问刀斧之说有稽乎曰举世尽云必有其稽叟曰见鹞冠子所谓五脏刀斧者非

所食之梨乃离别之离尔盖言人之别离戕伐口怀甚若刀斧遂就架取一小策振拂以呈丞相乃鹞冠子也检之如其说李特加重

梦溪笔谈李献臣好为雅言曾知郑州时孙次公为陕漕罢赴阙先遣一使臣入京所遣乃献臣故吏到郑庭参献臣甚喜欲令左右延饭乃问之曰餐来未使臣误意餐者谓次公也遽对曰离长安日都运待制已治装献臣曰不问孙待制官人餐来未其人曰沮而言曰不敢仰昧为三司军将日曾吃却十三盖鄙语谓遭杖为餐献臣掩口曰官人误也问曾与未曾餐饭欲奉留一食耳

石曼卿为集贤校理微行娼馆为不逞者所窘曼卿醉与之校为街司所录曼卿诡怪不羁谓主者曰只乞就本厢科决欲诘旦归馆供职厢帅不谕其谑曰此必三馆吏人也杖而遣之

明道杂志韩少师持国每酒后好讴柳三变一曲其一句云多情到了多病有老婢每听之辄云大官体中每与人别我天将风雨辄体中不佳而贵人多情致病耶又有一官人谈话好文尝谒一班行临退揖而前曰未敢款谈旦夕专候宇下班行作色曰何如口取今日晴暖说了而此官人了不解

续明道杂志蕲州一日有赦书至乃绍圣五年五月朔受传国宝赦也郡官未知赦因请问太守其守妄人也曰此赦以近修大庆殿成耳乃是赦文中有一句云告成大庆记唐人有得友人书云改年多感即宣传云近改多感元年正类此事

老学庵笔记绍圣元符之间有马从一者监南京排岸司适漕使至随众迎谒漕一见怒甚即叱之曰闻汝不职正欲按汝何以不亟去尚敢来见我耶从一惶恐自陈湖湘人迎亲窃禄求哀不已漕察其语乃南音也乃稍霁威云湖南亦有司马氏乎从一答曰某姓马监排岸司耳漕乃微笑曰然则勉力职事可也初盖误认为温公族人故欲害之自是从一刺谒但称监南京排岸而已传者皆以为笑

可谈滕宗闵知楚州有监司过境本州送酒食书有臣名既上闻既鞫狱乃书吏误用贺月旦表无他意滕坐送吏部监当盖知州细口字多欲谨书吏每患难写乘暇用纸写前后口谓之空头表笺用之故已不虔向宗传为兴国军判官托士人作书与漕使小筒用金石清光俞允等字漕使举行取勘宛转自解仅免士人于书尺多不识体要往往误人宜谨用自不能识者不若不发书

梦溪笔谈尝有人自负才名后为进士状首扬历贵近曾谪官知海州有笔工善画水召使画便听掩障自为之记自书于壁间后人以其时名至今严护之其间叙画水之因曰设于厅事以代反坫人莫不怪之余窃意其心以谓邦君屏塞门管氏亦屏塞门邦君为两君之好有反坫管氏亦有反坫其文相属故缪以屏为反坫耳

库藏中物物数足而名差互者帐籍中谓之色缴尝有一从官知审官西院引见一武人于格合迁官其人自陈年六十无材力乞致仕叙致谦厚甚有可观主判攘手曰某年七十二尚能拳驱数人此辕门也方六十岁岂得遽自引退京师人谓之色缴

挥麈三录李泰发之迁责海外也欲寓书秦丞相以祈内徙而无人可遣门人王彦恭趯罢雷守闲居全州泰发乃作秦书托王为寻端便王邻之居有李将领者坐岳侯事编置于郡与闾里通情趯令其子司法者从李将就雇一口遣往会稽授书于泰发家既至越泰发子弟不敢以人入都乃就令此介自往相府投之既达于秦忽令问李参政今在何所远人仓猝遽对云李参政见在全州与王知府邻居盖误以李将为泰发也且云有王法司与李参政亲以书付我令来盖错愕之际又称司法为法司也秦怒于是送大理寺根勘行下全州体究李光擅离贬所如何辄敢存留在本州且追王趯并王法司赴狱而全州适有法司人吏姓王者亦与彦恭舍甚迹俱就逮后体究得泰发初未尝离昌化但诬彦恭以前任过愆

除名勒停编管辰州王法司者懵然不知亦勒认赃罪杖脊当时闻者无不笑而怜之

二老堂诗话绍兴十年六月一日甲辰左光禄大夫守尚书右仆射同中书门下平章事兼枢密使监修国史秦桧札子奏臣闻德无常师主善为师善无常主协于克一此伊尹相汤咸有一德之言也臣昨见金国挾懒有讲和割地之义故赞陛下取河南故疆既而兀朮戕其叔挾懒和议已变故赞陛下定吊民伐罪之计今兀朮变和议果矣臣请为陛下先至江上谕诸路帅同力招讨陛下相次劳军如汉高祖以马上定天下不宁厥居为社稷宗庙决策于今日臣言如不可行即乞罢免以明孔圣陈力就列不能者止之义臣无任恳切之至有旨依奏右张嶷代作嶷元任司勋员外郎五月除起居舍人八月除中书舍人当时朝士大书法慧寺门云商汤为太甲孔圣作周任盖误以伊尹告太甲为相汤而论语载孔子道周任之言今直以为孔圣也

墨庄漫录世传宗室中昔有昏谬俗呼为泼撒太尉一日坐宫门见钉校者亟呼之命仆取弊履令工以革护其首工笑曰非我技也公乃悟曰我谬也口呼汝矣适欲唤镗漏

俗呼

骨路

者耳闻者大笑之

老学庵笔记姓但者音若檀近岁有岭南监司曰但中庸是也一日朝士同观报状见岭南郡守以不法被劾朝旨令但中庸根勘有一人辄叹曰此郡守必是权贵所主问何以知之曰若是孤寒必须痛治此乃令但中庸根勘即是有力可知同坐者无不掩口其人悻然作色曰拙直宜为诸公所笑竟不悟而去癸辛杂识浙之东言语黄王不辨自昔而然王克仁居越荣邸近属也所居尝独毁于火于是乡人呼为王火烧同时有黄瑰者亦越人尝为评事忽遭台评云其积恶以遭天谴至于独焚其家乡人有黄火烧

之号盖误以王为黄耳邸报既行而评事之邻有李应麟者为维扬幕一见大惊知有被火之事亟告假而归制使李应山怜之馈以官楮二万及归则家无患乃知为误耳盖黄无辜而受王之祸而李无望而得二万之获殊可笑

悦生随抄田景咸在邢州日供奉官王班者奉使至郡景咸劝班酒曰王班请满饮典客遽白此使者姓名也景咸始悟曰何不素教我我谓王班是官尔闻者皆笑之

贤奕正统丙辰状元周旋温州永嘉人初阁老预定第一甲三人候读卷因问同在内诸公云周旋仪貌何如或以丰美对阁老喜及传牒不类所闻盖丰美者严州周瑄听之不真而误对耳

错误部杂录

因话录人道尚右以右为尊礼先宾客故西让客主人在东盖自卑也今之人或以东让客非理也盖缘在所在地主在东俗有东行南头之戏此乃贵其为一方一境之主也记曰天子无客礼莫敢为主焉故君适其臣升自阼阶不敢有其室也注云明享君非也今之方镇刺史入本部于令长以下礼绝宾主犹近君臣至于藩镇经管内支郡则俱是占南面诸侯但以使职监临如台省之官至外地既通燕享则异君臣而用古天子升阼阶之仪昧于礼经遂同僭拟是不讲贯所致又小人姑息讹谬相承亦可笑且叹也

酉阳杂俎小戏中于奕局一枰各布五子角迟速名蹙融予因读坐右方谓之蹙戎又尝览王充论衡言秦穆为缪及往往见士流遇人促装必谓之曰车马有行色直台直省者云寓直实为可笑乃录宾语甚误者着之于此

后山谈丛予为汝阴学官学者多言万寿之西颍水之上有林号税子步步之西有异木人莫能名相传数百岁荣落不时旧有碑云粉黛涂容金预之树余过之往观焉木身纔十数年尔是时岁暮群木皆落

从者以为枯也木下有刹石石有象文有铭云曹公有悟怖心未已敬造浮图式崇妙理文词阐相粉黛涂容金刹一树永出烦笼开元十六年岁在执徐首旬五日建地故佛氏道口石乃刹下铭也粉黛涂容谓建像也金刹一树谓建刹也读者寡陋传者喜为缘饰苟无此石亦足惑世也

琅嬛记吴郡有婚姻墩昔有女子送葬道逢书生于此各以目相挑后成婚姻故以为名后世误以婚姻为分金且以为管鲍事更谬